



Minggu, 19 Maret 2023

Ogen: Matius 6:25



Aru Ate La Nambahi Umur



Pinakit asam lambung ras aru ate la terpesirang. Salah sada dampak gejala penakit asam lambung e me mbiar rusur ras aru ate katawari paksa pe. Tupung Jesus kotbah i datas Uruk itamakenna palas kegeluhen si mbaru man ajar-ajarNa i bas ngikutken Tuhan Jesus. Sada si cukup gedang iturikenna e me gelah *ula aru kerna nakan ras inemen*. Amin pe teptep wari kita perlu nakan ras inemen. Aru ate ngolangi kita i bas ngidah kuasa Tuhan, er aru ate e dosa. Kearun ate erbahanca kita la teneng, la erpengarapen, nusahi pertunduh ras erbahanca kita la ngidah pasu-pasu Tuhan si deban. Kearun ate erbahanca kita ragu-ragu ras la tek man Tuhan, amin megati sikataken maka *Jahwe me kap permakanku*.

Tuhan Jesus pe ngajarken kerna cara rukur ajar-ajar gelahna ia ermalem ate nggeluh rembak ras Tuhan. Maka nina, *ergan nge kesah asa nakan*. Kesah ntah pe kegeluhen e me pasu-pasu Tuhan, labo kita nggeluh guna nakan, kita man gelah nggeluh. Jadi labo soal kai man pangan tapi soal uga kita ngergaken kegeluhen e alu ngaturken perpan. Pangan ras inemen perlu guna kegeluhen tapi tujun geluhta e jine mulian ras ergan asangkan penopangna. Tole nina Tuhan, *ergan kula asangkan uis*. Uis perlu guna nutupi kulanta, mereken kenyamanan, menentukan derajat pergaulen ras harga diri. Ajar-ajar Tuhan iajari guna tek man Tuhan si mperjilei kita arah bas nari. Kulanta si sehat, kulanta sibersih e me bekas tinepa Tuhan si mejile na. Adi sehat denga kita ngasup denga kita jadi pasu-pasu man kalak e me kinijilen ras kinihagan si tuhuna. Emaka muliakenlah Tuhan si nepa kita alu ngataken bujur erkiteken kuh kerina ring-ring kulata e.

Kalak si eraru ate situhuna ia nggo mate amin gia nggeluh denga. Kalak si mbiar susah kerna nakan ras uisna situhuna nggo leben isusahi perukurena jine.